

Presidente di Fundacion Adopt an Addict, sra. Audrey Lacle

Fundacion Adopt an Addict satisfecho cu recuperacion di personanan den rehabilitacion

Hogares Crea ta funcionando positivamente pa nos hendenan

ORANJESTAD – Fundacion Adopt an addict a realisa un biahe pa Santo Domingo y den e biahe ei nan a experimenta loke ta Hogares Crea y a bishita 8 diferente luga, a wak e terapia cu e personanan cu ta buscando pa rehabilita ta pasa door di dje, e cuminda cu nan ta come, nan parti di ubicacion den e cas y tambe e parti di recreo cu nan tin y tambe tur otro tipo di disciplina cu nan tin cu pasa dor di dje.

Sra. Audrey Lacle a bisa cu e tabata un biahe hopi fructifero y nan a bai cu sr. Robby Guda, sr. Frank Thielman y sra. Audrey Lacle mes, cu a bai cu 7 persona cu a bai den rehabilitacion.

E tabata un biahe basta fuerte y tabata tin poco retraso den e buelonan y esaki ta basta fastioso den e proceso aki. Sra. Lacle a muestra cu e tabata hopi educativo y fructifero y nan a constata cu cosnan ta canando hopi bon den e Hogares Crea y a haya un bon bista riba e structura. Sra. Audrey Lacle a bisa cu te awor aki e mayoria di esnan cu ta den rehabilitacion ta hopi bon y un persona cu ta den su periodo di affkick ta den un proceso di 4 pa 8 siman ta e parti di mas dificil y a topa un par di nan cu a bai prome y cu tabata den e epoca ei. Nan ta rebeldia y nan kier a bin cas, pero ta sigui motiva y yuda nan. Sra. Lacle a bisa cu e mes casi tur anochi ta yama Hogares Crea pa wak con e

pashentnan ta bayendo y tin di nan ta pasa den un periodo dificil, ta rebeldia, pero cu sosten di e fundacion y tambe haciendo e famia consciente con pa trata e hendenan aki y den e epoca ei bo ta haci un sistema di tough love, unda cu ta comunica menos cu e personanan aki cu nan famia y ora ta cu e hendenan aki na telefon, no mester tene duele di nan y no duna nan ningun noticia negativo, pero mester keda sostene nan. Mester motiva nan pa sigui y esei ta e mensahe cu e famia mester duna tambe e persona cu ta den rehabilitacion. E momento cu e famia bira swak, mesora esun den rehabilitacion ta uzabo y ta pidi bo pa manda

e pasashi pa e bolbe.

Esaki no ta e idea pero e idea ta pa nan pasa dor di e periodo dificil aki, anto ora nan pasa den e proceso aki e caminda ta bira mucho mas facil.

Tambe tin hende cu a bai for di aña pasa y por conta di e personanan aki, unda cu el a pasa den e proceso dificil aki y e terapia ta traha y el a sa di pasa e periodo dificil aki y pesei mester di e sosten di e famianan aki banda cu tin biaha ta keda yama nan famia cu ta pone nan duda.

Loke mester pasa ta cu e yamadanan mester ta menos frecuente. Si e yamadanan ta mas positivo y no conta nada negativo di aki banda, ta duna nan menos gana di bolbe cas.

Te aworaki tur cu a ser manda ta na Santo Domingo cu excepcion di uno cu a bin cu un motibo priva, pero el a bisa cu e ta bai bek, pero ta cuestion di warda wak si e persona aki ta bai bek. Sra. Lacle a enfatisa y a hasta muestra potret di un di e adictonan cu pa hopi a kere cu no tin salvacion, pero por a mira un potret di dje,

y awe e ta hopi mas miho den apenas algun luna di su tratamiento. Sra. Lacle a referi aki na Natalee, cu hopi tabata wak ta cana rond, awe e ta practicamente recupera y ta contento den e proceso cu el a pasa y hasta a recomenda pa mas di su coleganan bin e centro pa haya e yudansa cu e ta hayando.